

Inuusuttut suliffissaaleqinerat qanoq iliuuseqarfigineqarnera qanorlu akiorniarneqarnera pillugu apeqquteqaat aallaavigalugu oqallisissiaq.

(Inuit Ataqatigiit Inatsisartunut ilaasortaataat)

Akissuteqaat

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Qujanarsuaq siunnersuutissinnut, Inuit Ataqatigiit.

Oqallinnissaq pingaaruteqartorujussuaq aallarnerparsit.

Maannamut suliniutaasut pillugit, aammalu siunissamut inuusuttut suliffissaaleqinerisa akiorneqarnissaa pillugu partiit ataasiakkaat Naalakkersuisullu qanoq isumaqarpat?

Maannamut suliniutaasut siunissamullu sammisumik inuusuttut suliffissaaleqinerannik akiuiniarluni suliniutaasariaqartut pillugit oqallinneq una, inuusuttut suliffissaaleqinerisa sapinngisaq tamaat appasinnerpaaffissaminiitsinnissaa eqqarsaatigalugu tamavitta partiini assigiinngitsuni ataatsimoorluta paasinninnissatsinnik piumasaaqateqarpoq. Taamaattumillu nuannaarutissaavoq siunnersuutikkut ataatsimoorluta iliuuseqarnissarput Inuit Ataqatigiinniit aallarnerneqarmat, ajunngitsumillu isumaqarluta, oqallinneq una atorlugu Nunatsinnut minnerunngitsumillu inuusuttagut eqqarsaatigalugit naalakkersuinikkut qanoq ittunik neriuuteqarnerput, qanoq ittunik ernummateqarnerput pillugu eqqartuinissamut tamatsinnut periarfissisoqarluni.

Maannakkut inuusuttut suliffissaaleqinerat eqqarsaatigalugu, inuusuttut suliffissaaleqinerisa qaffasissusianut pissutsit arlallit pissutaapput.

Siullertullu nassuerutigisariaqarparput meeqqat atuarfiannit naammassillutik atuarunnaartartut amerlasuut, ilinniagaqarnissamut suliffimillu aalajangersimasumik ingerlatsisinnaanermut fagitigut inuttullu piginnaasat pisariaqartut naammattullu pissarsiarisimanagit meeqqat atuarfiat qimattarmassuk. Tamatumunngalu pissutaasut amerlasuujupput, meerartattalu inuusuttortattalu ilinniagaqarnissaannut suliffeqalernissaannullu piareersarneqartarnerannut suliassarujussuarmi meeraaneranniilli siusissukkut aallartinnissarput pisariaqarpoq.

Meeqqat atualernissaat sioqqullugu suliniutaasartut nukittorsarneqartariaqarput, taamaaliornitsigut meerartagut meeqquerivinnik qimatsigaangamik atuarleraangamillu ilikkagassamut pisareersimaitilerlugit. Meerartatta isumannaatsumik aalajangersimasunillu tunngavilimmik ineriartortinneqarnerisigut tamanna qulakkeerneqassaaq.

Tunngaviumik atugassarititaasut tamakkua aatsaat aaqqinneqareerpata meeqqat atuarfianni ilinniarfinnullu ingerlaqqittarnermut tunngasumik suliniutigut sunniuteqalissapput.

Inuusuttut suliffissaaleqinerisa appasinnerulersinniarnerani ingerlatsiviit pingaarluinnartut tassapput Piareersarfiit.

Inuusuttuaqqammi meeqqat atuariat qimareerlugu Piareersarfimmut saaffiginnikkaangata inuussutissarsiutinut ilinniagassamut tunngasumik siunnersorneqarnissaq pillugu, amerlasuutigut ersertarpoq inuusuttatta amerlasuut meeqqat atuarianni angusimasaat ilinniagaqarnissamut aqcutissiuussisusussat naammaginatsumik angusaqarfigisimasannikkaat. Taamaattumillu ukioq ataaseq marlulluunniit piginnaanngorsaqqaartariaqartarlutik.

Inuusuttuaqqat atuagarsornikkut piginnaaneri qaffasinnerulersinniarlugit suliaq Piareersarfiit 2006-imi aallartinneranniit ingerlanneqartoq minnerulersimannilaq, naamerluinnaq. Takusarparput inuusuttuaqqat meeqqat atuarianni karakterit pissarsiatik qaffasinnerulersinniarlugit assut pisariaqartitsisartut, suliassarlu taanna ukiuni aggersuni minnerulertussatut isikkoqanngilaq.

Atuagarsornikkullu suliniutit taakku pisariaqartinneqartut saniatigut Piareersarfiit amerlasuut annertusiartuinnartumik maluginiarpaat atuagarsornerunngitsumik iliuseqarfigineqarnissamik inuusuttut amerliartuinnartut pisariaqartitsinerat, inuttut ineriartornerminnik tunngavilimmik atuagarsornikkut ilinniagaqarnissamut piareersimannigitsut. Taakkua Piorsaavittut ittunik imaluunniit Timi Asimi aqqissuussinertut ittunik ineriartornerminni pisariaqartitsipput. Inuusuttuaqqammi tamakku ilarpassui ineriartornerminni sumiginnagaasimanermik annertuumik misigisaqarsimasuusarput, taamalu nammineq imminnut killissaminnillu ilinniaqqaartariaqartarlutik, atuagarsornikkut ingerlatsinissaminnut imaluunniit aalajangersimasumik suliffeqalernissaminnut piareersinnaajumallutik.

Taamaattumik AIS2015-imut aamma AIS2016-imut atatillugu Piareersarfimmut ilassutitut aningaasaliissuteqartoqarnissaa Naalakkersuisut sulissutigaa, taamaaliornikkut inuusuttuarartatsinnut atuagarsornerunngitsunik pisariaqartinneqartunik amerlanernik ingerlatsisoqarsinnaaqullugu.

Inuusuttuaqqat iluatsittumik meeqqat atuarianni atuareersimagaangamik aatsaat, imaluunniit piginnaasanik qaffassaaffiusumik Piareersarfimmiissimagaangamik aatsaat ilinniakkamik aallartitsisinnaalersarput, taamalu suliffissaaleqilersinnaanermut akiuussutissamik pitsaanerpaamik pissarsisimasarlutik, tassalu ilinniagaqarnermik.

Suliniut taanna tassaavoq nuna tamakkerlugu suliffissaaleqinermit akiuiniarnerminni Naalakkersuisut suliniutaat. Suliffissaaleqinermit akiuiniarnermit pilersaarut suliniutinik 16-inik imaqarpoq, tassanilu pingaarnertut anguniakkat ilagaat inuusuttuaqqat akornanni suliffissaaleqinerup malunnaatilmik apparsarneqarnissaa. Inuusuttuaqqat suliffissaaleqisut makitinneqartassapput. Anguniagaq tassaannilaq maannakkoqqinnaaq inuusuttut sulilernissaat. Inuusuttortatta suliffissaaleqisut 90 % -ii ilinniagaqarsimannigillat, Naalakkersuisullu pilersaarutigaa inuusuttut suliffissaaleqisut tamarmik sapinngisamik annertunerpaamik piginnaasamikkut qaffassaavigineqassasut. Taamaaliornitsigummi taamaallaat ungasinnerusumut suliffeqarnikkut inuiaqatigiinni sanngiinnerusumik inissisimasortagut peqataatilersinnaavagut.

Taamatullu oqaaseqarlunga iluaqutaasumik oqallittoqarnissaa qilanaaraara.